

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

15 Décembre 2017

(26 Rabi'ul Awwal 1439 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « *Patience de bane Prophètes* ».

Depuis le commencement même de la création, kan Allah fine créer sa le monde là, Allah fine envoye bane prophètes dans tous bane l'époques et à tous bane nations du monde. Ene lignée de bane prophètes fine vini, kot zot tous fine recevoir l'honneur et la nobilité grâce à zot lien avec le Messenger de bane Messagers, nous bien-aimé maître Hazrat Muhammad (saws), kot tous sa bane prophètes là, zot tous fine bizin passe par plusieurs de bane épreuves; kot tellement ena épreuves ki pas capave même compter! Et tous sa bane prophètes là fine conne bane pires difficultés durant zot mission prophétique. Et zot fine bizin affronte bane l'ennemis bien féroce, kot en plus de sa, ena parmi sa bane l'ennemis là zot ti bane assassins, zot ti soif disang de sa bane prophètes là, et kot zot fine place zot couma ene barrière en métal lors le chemin de sa bane prophètes là durant zot séjour lors sa la terre là.

Mais tous fine ena le même sentiment, même réaction: la patience, la confiance en Allah Ta'ala et la foi. Aparte sa bane prophètes là, certains de zot bane madames aussi fine gagne le malheur pou conne zot aussi bane pires difficultés. Zot aussi zot fine fer faire preuve d'ene patience bien solide.

Azordi mo pou cause avec zot ene partie lors l'histoire triste de Hazrat Yusuf - Joseph (as). Hazrat Yusuf (as) ti ene garçon ki ti bien jeune et zoli et so bane frères - so bane demi-frères - de même disang ki li, fine trahir li, et pas zis zot ki fine trahi li, mais aussi li fine être trahi par madame de Al-Aziz, premier ministre de lé Roi d'Égypte. Kan bane là fine fer li alle dans prison, li pas fine perdi ni l'espoir, ni patience. So papa Yaqub - Jacob (as) fine bizin subir bane pires difficultés à cause maltraitance ki so garçon bien-aimé fine bizin passer. Li aussi fine faire preuve de patience, et guidé par so la foi (*Imaan*) et bane révélations divines, li fine soumettre li à Allah Ta'ala. Li fine ena confiance dans décret d'Allah. Sa patience là fine amène papa et garçon vers trouve la raison, la victoire et la réconciliation familiale.

En vérité, Yusuf ti perdi so mama pendant so l'enfance. Plus tard, alors ki li ti relativement jeune, so bane frères (tous so bane demi-frères, à l'exception de so propre frère de même maman et papa, Benyamin) fine zoine la tête ensam pou faire complot contre li, fine arrache li, sépare li de zot papa et fine zette li au fonds d'ene puits kot ene l'avenir incertain ti pé attane li. Ensuite, bane dimounes dans ene caravane fine recueillir li et fine faire li vine ene esclave kot zot fine vende li par la suite pour quelques sous dans marché de bane esclaves.

C'est premier ministre et trésorier d'Égypte (ki ena le titre d'*Al-Aziz*) ki fine acheter li. Mais dès ki li fine installe li kot so maitre, li fine vine la cible d'ene série de bane mauvais complots. Hazrat Yusuf (as) ti physiquement bien beau, bien zoli, et li ti ena ene bien bon caractère et li ti gentille envers zot tous, et à cause de sa, beaucoup bane madames et filles ti pé désire li; même Zuleikha, madame de Al-Aziz ti désire li. Madame Al-Aziz ti oulé commette l'adultère avec li. Mais Hazrat Yusuf (as) fine repousse so bane nombreux l'avances et fine cherche refuge auprès d'Allah. Li fine dire sa femme là ki zamaiz li pas pou trahir so missié. Li fine dire madame d'Al-Aziz: **« Li (c'est-à-dire, Al-Aziz) fine bon envers moi et fine traite moi avec respect (li fine rende mo séjour parmi zot honorable). »**

Mais madame là fine trop vexé, et li fine menace pou faire li fermer dans prison si arriver li pas céder et vine vers li. Mais la vérité fine fini par éclater. Mais malgré bane preuves claires lors l'innocence de Hazrat Yusuf (as), Al-Aziz et so bane membres conseil fine prend la décision pou fer li alle dans prison pour quelques temps afin ki sa nouvelle là pas répanne et afin pou empêche kit contact entre Zuleikha et Hazrat Yusuf (as) ziska ki sa z'histoire là teigne. Alors, Hazrat Yusuf (as)

fine bizin passe plusieurs l'années dans prison, et couma ene fois mo ti déza dire zot, li fine passe sept ans dans prison. Ensam avec li dans prisons ti ena deux les autres dimounes, mais selman zamais li fine perdi patience et ni li fine perdi la foi dans Allah Ta'ala.

À so bane compagnons de prison, li fine démontrer envers zot l'affection, l'amour et li fine enseigne zot tous bane bons kitchoses de la vie. Versets 40-41 de Chapitre 12 (Yusuf) raconte sa bien en détail, kot Hazrat Yusuf (as) ti dire zot:

« Ô mo deux compagnons de prison ! Eski plusieurs maitres séparés meilleurs pour zot ou sois Allah, l'Unique et le Dominateur suprême. Bane ki zot adorer aparte Li zot nek bane noms ki zot et zot bane ancêtres fine donne sa bane là. Allah pas fine donne sa bane là aucaine pouvoir. Le jugement appartenir seulement à Allah. Li fine ordonner ki zot adore zis Li tousel: c'est sa la religion ki correcte (et ki pas capave changer), mais la plupart dimounes pas conné ... ».

Quand bane frères de Yusuf fine vine annonce à zot papa sa incident ki soi-disant Yusuf (as) fine enlever (par lélou), papa là pas fine oulé croire zot. Li fine place so confiance dans Allah et fine soumette à décret d'Allah et li fine démontrer ene patience inégalable (ene patience ki pas ena so pareil, tellement so patience et so confiance dans Allah, dans So bane révélations ti bien solide). Parski li ti absolument convaincu ki destin de so garçon bien-aimé trouve dans la main d'Allah, le Créateur. Mais au fond de li-même, en tant ki ene papa ki ti bien content so garçon, li pas ti capave contenir so chagrin et li ti pé pleurer la nuite lizour kot li fine tombe malade et kot fine arriver même ki li fine perdi la vue.

Bien ki so garçon fine disparaite pendant plusieurs l'années, Yaqub (as) fine reste toujours pense li. Seule la patience, la foi et la révélation divine fine donne li impé soulagement et tranquillité. Ene jour fine arriver, kot li fine ordonne so bane garçons pou rétourne en Égypte pou alle fer recherche de zot frère, Yusuf (as).

Zot fine prépare zot pou fer sa longue voyage là avec beaucoup de difficultés à cause de la famine et de la sécheresse. Kan vrainême zot fine réussi rétrouve zot frère, sans ki zot conner zot frère sa, zot ti tellement fatiguer kot zot ti dans ene l'état pire ki bane dimounes affamé. Yusuf fine reconnaite zot mais zot, zot pas fine reconnaite li. Mais après li fine réussi révèle à so bane frères so identité et fine raconte zot tous saki fine traverser dans so la vie. Bane frères ti choqué kan zot fine réalise couma zot frère ti ene dimoune avec ene grand l'âme, ene

dimoune ki ti bien généreux et patient, ene telle patience ki bien rare pou trouver. Verset 91 de Chapitre 12 de Quran Shareef fine faire référence à la patience de Yusuf (as).

Zot fine dire: « Eski c'est toi Yusuf? » - Li fine dire: « Moi Yusuf, et sa c'est mo frère. En vérité, Allah fine fer beaucoup faveur lor nous. Celui ki ena la crainte d'Allah et la patience... alors très certainement, Allah zamais laisse perdi récompense de bane ki faire le bien. »

Kan bane frères ki fine fer beaucoup *zulum* là fine retrouve Yusuf (as), zot fine gagne peur. Parski zot frère ti népli sa jeune garçon timide ki zot ti abandonner là. Mais li ti le premier ministre d l'Égypte. En vérité, à travers bane épreuves et bane difficultés, Yusuf pareil couma so papa, fine trouve réconfort et soutien dans so patience et so soumission à Allah Ta'ala. Li fine réalise vrai valeur de la patience, ki ena ene lien étroit avec la miséricorde et la piété. Yusuf (as) fine pardonne so bane frères (Verset 93 de Chapitre 12).

Li fine dire: « Pas aucaine blâme contre zot azordi! Ki Allah pardonne zot. C'est Li Le plus Miséricordieux de bane miséricordieux. »

Kan li fine fini zoine so bane frères et pardonne zot, Yusuf (as) pas fine perdi lé temps et fine faire plan pour réunir so la famille. Li fine demande à so bane frères pou retourne auprès de zot papa et pou annonce li la nouvelle. Li fine donne zot ene de so bane chemises avec l'instruction ki papa là passe sa lors so liziés. Kan li fine fer sa action là, Hazrat Yaqub (as) fine retrouve so la vue. Toute la famille fine retourne dans l'Égypte pour rencontre sa garçon ki zot ti perdi et astaire ki zot fine retrouver. Kan zot tous fine arrive là-bas, zot fine surpris pou apprane ki Yusuf fine vine premier ministre et trésorier de sa royaume là. Le Quran Shareef conclure z'histoire de Hazrat Yusuf (as) avec l'interprétation de so rêve ki li ti faire kan li ti tipti et ki li ti raconte so papa et Quran Shareef ti raconte sa rêve là dans verset 5 de Chapitre 12 (Yusuf).

« O mo papa, mo fine trouve (dans mo rêve), onze zétoiles, et aussi soleil et la lune; mo fine trouve zot prosterné devant moi ».

Sa onze zétoiles là ti so bane frères, soleil c'est so papa et la lune madame de so papa (so maman d'adoption/ so belle-mère). *Masha-Allah*. Zot tous fine recevoir de Yusuf ene accueil chaleureux. Yusuf (as) fine expliquer ki so patience et so la

foi dans so Créateur fine permette ki so la famille réuni et vive dans le pardon, dans la confiance et dans la patience.

Morale de sa z'histoire de Hazrat Yousouf (as) là c'est ki face à l'adversité et la tristesse, ena zis ene sel chemin: la patience. Yusuf (as) fine faire face à sakaine de so bane épreuves avec patience et li fine soumette li totalement à Allah Ta'ala. Hazrat Yuqub, so papa, kan li fine faire face à la détresse et tristesse de la perte de so garçon, li aussi fine soumette à Allah So décision et prend patience.

Sa Surah spécifique lors la vie de Yusuf (as) ti révéle au prophète Muhammad (saws) à ene période spécifique de so la vie. Li ti dans ene grand douleur. Li ti perdi so madame bien-aimée, Khadijah et so Chacha Abu Talib, deux dimounes ki ti proches de li depuis le début de so mission difficile.

L'histoire de Hazrat Yusuf (as) li ene leçon pour sakaine de nous dans l'Ummah Islamique: la patience li certainement ene de bane la clefs du paradis. Certes la patience li amer mais so fruit li bien doux.

Ki Allah accorde nous tous le don de la patience et combler nous de So bane bienfaits. Nous bizin Li, nous bizin So l'aide pour faire face à bane difficultés de la vie. Que ce sois dans bane moments de malheurs ou de bonheur, nous bizin toujours mazine Allah et remercier Li pour tous So bane bienfaits. *Ameen.*